



Siège national  
47 rue d Clichy  
75311 Paris Cedex 09  
Tél : 01 45 96 03 05

## FANDRAISANA NY FANASAN'NY TOMPO ANY AN-TOKATRANO

Mbola ao anatin'ny "confinement" isika mianakavy ka voaterin'ny zava-misy hanao fanao tsy mahazatra antsika loatra mba hikolokoloina ny fiainanam-panahintsika. Efa notombontsika ohatra ny Fotoam-mivavahana amin'ny "Radio" na amin'ny YouTube na ny Zoom na ny ConfCall. Isaorana ny Tompo fa na dia tsy mahasolo ny mifanatrika aza ireo dia hita sy re fa mitondra aim-panahy ho an'ny maro.

Ankehitriny dia handroso amin'ny lafiny hafa indray isika satria handray **Fanasan'ny Tompo** manomboka amin'ny Alahadin'ny Sampan-drofia izao. Noho izany dia ilaina ny manao ireto fanazavana manaraka ireto.

**Ny voalohany** amin'ireny dia izao, teo anivon'ny tokatrano iray no nanorenan'ny Tompo ity Fanasana Masina ity. Hoy ny Mar 14.14-16: *"Ary lazao amin'ny tompon'ny trano izay hidirany hoe: Iza no lazain'ny Mpampianatra: Aiza ny efi-trano hiarahako mihinana ny Paska amin'ny mpianatro? 15Ary izy hanoro anareo efi-trano malalaka ambony rihana izay voaisy fipetrahana sady voavoatra tsara; any no amboary ho antsika."*

**Faharoa** manaraka izany dia teo an'ivon'ny Tokatrano koa no nanomboka ny fiangonana voalohany. Teo amin'ireo Tokatrano ireo ny vahoakan'Andrimanitra no nandray ny Fanasan'ny Tompo. Hitantsika ohatra izany ao amin'ny Asa 2.46: *"Ary dia niray saina isan'andro izy ka nazoto nankeo an-kianjan'ny tempoly ary namaky mofa tao an-trano ka nihinan-kanina tamin'ny fifaliana sy ny fahatsaram-po"*.

Toy izany koa taona maro efa taty aoriana dia mbola hita ao amin'ny Epistily ho an'i Filemona ny toy izao: *"Paoly, mpifatotra an'i Kristy Jesosy, ary Timoty rahalahy, mamangy an'i Filemona, izay malalanay sy mpiara-miasa aminay, 2ary mamangy an'i Apia anabavinay sy Arkipo, miaramila namantsika, ary ny fiangonana ao an-tranonao:"* Tao an-Tranon'I Filemona ny Fiangonana ary tao no natao ny fanompoana rehetra.

**Ny fanazavana fahatelo** mila resahina eto koa dia ity: Tsy manala ny fahamasinan'ny Fanasan'ny Tompo mihitsy ny fanaovana izany ao an-tokatrano sy isam-pianakaviana. Noho izany dia ireto misy hafatra vitsivitsy ho antsika izay handray Fanasan'ny Tompo mba hihomanana amin'izany:

1. Zava -masina ny fanasan'ny Tompo ka tsy tokony ho raisina amin'ny Fanahy tsy mendrika hoy ny apostoly Paoly ao amin'ny 1Kor 11.27: *"Koa na zovy an zovy no mihinana ny mofa sy misotro amin'ny kapoaky ny Tompo amin'ny*

*fanahy tsy mendrika, dia ho meloka ny amin'ny tena sy ny ran'ny Tompo izy".*

2. Koa toy izao ny fiomanana hataontsika:

2.1 Alaina ny mofo sy ny divay na ny ranom-boaloboka efa novidiana.

2.2 Alohan'ny hanomananao ny latabatra Masina dia miara-vavaka ianareo ao an-trano ary mangataka famelan-keloka amin'ny Tompo noho ny tsy fahatanterahana ary mifamela heloka koa ny mpianakavy. (Ora iray mialohan'ny fotoana no hanaovana izany),

2.3 Rehefa ivita zany fiomanana am-panahy izany dia izay diakona na izay raiamandreny na izay iray amin'ny Mpandray ny fanasan'ny Tompo ao an-trano no manomana ny Mofo sy ny Kapoaka. Atao isan'ny Mpandray ny mofo sy ny Kapoaka,

2.4 Ho an'izay mipetraka irery dia tsarovy fa eo aminao ny Tompo ary miombona amin'ny fianakaviana rehetra miara-mandray amin'io andro io ianao,

2.5 Tehirizina tsara ny ambin'ny divay hanaovana ny manaraka indray,

2.6 Izay raiamandreny no mizara ny mofo sy ny Kapoaka rehefa tonga ny fotoana Fandraisana.

**2.7 Marihina nefa fa tsy atao fanao mahazatra ny toy izao fa noho ny toe-javatra ianantsika mandritra izao fitokana-monina izao ihany.**

Mahavariana ny fandehan'ny fiainan'ny Fiangonana ankehitriny ry Havana. Toa averin'ny Tompo amin'ny tena fototra isika nakehitryny. Ny fiombonana sy ny firaisana masina eo anivon'ny Fianakaviana no fototry ny firaisan'ny Fiangonana. Izany hoe raha tena manana firaisana sy Fifankatiavana ao amin'ny Tompo ny Fianakaviana rehetra ao am-piangonana dia ho mora ny hihainana izany Fiombonana sy firaisana izany eo amin'ny samy mpino mpiray Fiangonana.

Averin'ny Tompo amin'izany isika ankehitriny ry Havana. Atokan'ny Tompo monina isika Fianakaviana mba hitadiavantsika mafy izany Firaisana izany. Tena mampalahelo raha eo anivon'ny mpivady sy ny mpianakavy no mbola hisy laiga sy fihatsambelatsiny na dia efa izao aza ny mahazo ny zanak'olombelona.

Hataon'ny Tompo eo anivon'ny Fianakaviansika tokoa anie izany tena firaisana see fifankatiavana ao aminy izany.

Homba antsika rehetra Jeseosy

*PST SETH RASOLONDRAIBE  
Filohan'ny FPMA*